


ERROMESEK HIRU EGUN EGIN DITUZTE MUGAN, ETA AZKENEAN BISATURIK GABE SARTU DIRA

Saudi Arabiak ordainduko du 18.000 irakiarren erromesaldia

■ Islamaren aginduari jarraituz, milioika musulmanek Mekarako erromesaldia hasi dute

■ Saudi Arabiara sartzeko erromes bakoitzak 100 dolar ordaindu behar ditu

■ Irakeko erromesek, bahimenduaren ondorioz, ezin dute dirutza hori ordaindu



KARIM SAHIB / EPA

Milaka erromes, autobusetan, Saudi Arabiara sartzen Mekara joateko.

Erredakzioa / Donostia

IRAKEKO 18.000 inguru erromesek Saudi Arabiako muga zeharkatu zuten atzo, Mekako meskitara bidean, *hatx*-aren esanak betetzeko. Erromesak 400 autobus eta kamioitan sartu ziren Ararko mugatik barrena, hor mugitu gabe hiru egun egon eta gero. Irakeko Mohsen Farhud ofizialak gidatuta, erromesek Saudi Arabiako mugazainen bi postu igaro zituzten, geratu gabe.

Saudi Arabiako Fahd erregeak agindu zien mugazainei erromes irakiarrei sartzen uzteko. Gainera, irakiarren erromesaldiaren gastua Saudi Arabiak ordaintzeko agindua ere eman zuen erregeak, Naief Bin Abdel Aziz Barne ministroak adierazi zuenez.

Joan den asteazkenetik milaka erromes irakiar bildu ziren Saudi Arabiako Ararko muga ezarritako behin-behineko kanpalekuan. Irakiarrek Mekara sartu nahi zuten dirurik ordaindu gabe, baina Saudi Arabiako agintariek 100 dolarreko dirutza ordaintzera behartzen dituzte erromes guztiak (15.500 pezeta, 620 libera). Hala ere,

Zer da 'Hatx'?

Musulmanen erromesaldia da. Otoitzak eta pasioak uztartzen dituen jaia da. Islamaren oinarritzko aginduetako bat da musulmanek gutxienez bizitzan behin Mekara edo Medinara, Islamaren bi meskita nagusienetara, joan behar dutela. Aurten hilaren 26a da *hatx*-aren egun handia, bi gune musulmanek Mekan bat egingo duten eguna.

Saudi Arabiak, normalean, ez die musulmanei ukatzen Mekara joatea Islamaren aginduetako bat betetzera.

Kontua da Iraken egoera ekonomikoa oso kaskarra dela Nazio Batuen Segurtasun Kontseiluak 1991n ezarri zion bahimenduagatik. Irakeko Gobernuak izoztuta dituen fondoetatik 44 milioi dolarreko dirutza eskatu zien Nazio Batuei, erromesen bidaia finantziatzeko. Nazio Batuek, ordea, ukatu egin zioten eskaera, eta beste proposamen bat egin: Bagdad ez den norbaitek hornitu eta banatzeko dirua, agian, Gurutze Gorriak.

Diru arazo horrengatik urtero Irakeko 3.000 edo 4.000 inguru erromesek zeharkatzen dute Saudi Arabiako muga, nahiz eta Irakek 23.000 erromes bidaltzeko baimena duen.

Irakeko erromesak diru eta jakirik gabe egon dira hiru egunez Ararren. Horrengatik, Irakeko Gobernuak kamioiak igorri zituen hara, jakiekin eta premiazko beharrek.

Saudi Arabiaren ardura erromesekin

Milioika musulmanek urtero Mekara egiten duten ibilaldia oso garrantzitsua da Saudi Arabiarentzat. Agintariek neurri bereziak hartzen dituzte musulmanentzako sakratuak diren guneak zaintzeko. Izan ere, azken urteetan ezbehar ugari gertatu dira, hildako dezenterekin: 1987an 400 erromes inguru hil ziren segurtasun indar sauriar eta iraniarren arteko borroketan, 1997an 343 hil ziren sute batean, eta iaz 119 erromesen ihesaldi batean.

Irakeko hegazkinek bahimendua hautsi?

■ SAUDI ARABIAKO agintariek aske utzi zituzten atzo Jeda aireportuan erretenituta zituzten hegazkin irakiar bateko tripulazioko langileak. Hegazkinak herenegun lur hartu zuen aireportuan, Irakeko 124 erromesekin.

Iraketik Saudi Arabiara erromesak zekartzan hirugarren hegazkina zen, eta atzo bertan zen Bagdadera itzultzekoa.

Irakeko hegazkinek Saudi Arabiara erromesak ekartzeko egindako hegaldiek bahimendua hautsi ote duten edo ez eztabaida sortu da. Agintari saudiarren arabera, hegazkinek bahimendua urratu zuten, eta Nazio Batuei galdegin zioten zer egin. Nazio Batuetako Zigor Batzordeko kideak, ordea, ez ziren bat etorri hegazkinek bahimendua bortxatu zuten edo ez zehazterakoan, eta Saudi Arabiarengain utzi zuen auzia.

laburrean

I R A K

■ Hegazkin estatu batuar eta britainiarrek jomuga irakiarrei eraso diete hegoaldean

HEGOALDEAN dagoen debekatutako aire eremuan Irakeko bi jomugari eraso zieten atzo EEBBetako eta Erresuma Batuko hegazkinek, bozeramaile militar batek atzo jakinarazi zuenez. «Debekatutako aire eremuan irakiarrek egindako probokazioei erantzun diegu eraso eginez». Irakek debekatutako bi eremu ditu: iparraldean 36. paraleloan, eta hegoaldean 33. ean, eta EEBBetako eta Erresuma Batuko hegazkinek eremu horiek zeharkatzen dituzte.

E E B B

■ Ku Klux Klaneko buruzagi ohia Kongresuan esertzeko hautagaia da

DAVID DUKE Ku Klux Klan erakunde arrazistako buruzagi izandakoak atzo aurkeztu zuen bere hautagaitza Kongresuko kide izateko. Robert Livingston kongresukide ohi errepublikanoak utzitako hutsunea bete nahi du Dukek.

ETIOPIA-ERITREA

■ Borroketan hildako kopuruaz berri nahasiak daude

ERITREAKO Gobernuak «milaka soldadu getsai» hil dituela esan zuen atzo, aste honetan bi herrialdeen arteko muga izandako borroketan. Etiopiako iturri ofizialek gezurtatu egin zuten hori, eta guztia «asmazio hutsa» zela gaineratu zuten. Etiopiak baieztatu egin zuen atzo oraindik borrokan ari zirela bi aldeak.

T X I L E

■ Maputxeek protesta ibilaldia egin dute buruzagien atxilotzea salatzeko

200DIK gora maputxe indigenak Santiago hiriburuko kaleak zeharkatu zituzten atzo, hiru buruzagi maputxeren atxiloteta salatzeko. Joan den igandean hazienda batera sartu ziren maputxeak, eta horrengatik atxilotu zituzten. Gobernuak maputxeen prozesuan azaldu da, eta Auzitegi Gorenari auzia ikertzeko eskatu dio.